



**Planisaziun locala – model directiv dal territori cumünal – segunda lectüra**

La cumischiun da planisaziun cumünala es insembel cul planisader cumünal landervia a proseguir cul proget d'armonisaziun da la planisaziun locala dals anteriurs trais cumüns in ün unica. Tanter oter pretenda il Chantun Grischun, cha'ls cumüns as fan impissamaints sur dal svilup da lur territori cun crear ün model directiv dal territori cumünal (kommunal räumliches Leitbild). Ils gremis responsabels han repassà il sböz e cuntinueschan culla lavur.

**Revisiun parziala da diversas ledschas cumünalas pels 1. schner 2020 – segunda lectüra**

Cuntschaintamaing es la suprastanza cumünala landervia a preparar la prüma revisiun da diversas ledschas e reglamaints cumünals. Ils gremis responsabels han repassà il seguond sböz. I's prevezza da tractandar la revisiun da las ledschas d'urant la prüma mità dal 2020.

**Trafic public - traiget dal pass dal Flüela - cunvegna e finanziaziun 2020 e 2021**

Per cuntinuar eir in avegnir cul traiget da l'AutoDaPosta sur il pass dal Flüela es gnü fat üna cunvegna tanter il cumün da Tavo, la Davos Destinations-Organisation ed il Cumün da Zernez. La suprastanza ha approvà la cunvegna ed eir la finanziaziun pel 2020 e 2021.

**Pulizia cumünala – cunvegna e contrat culla pulizia chantunala**

Als 24 gün 2019 ha la radunanza cumünala approvà la dumonda da collavuraziun sül chomp da la pulizia cumünala culla pulizia chantunala dal Grischun a partir dals 1. schner 2020 per la d'urada dad almain 3 ons. La suprastanza ha trattà ed approvà la cunvegna da prestaziun sco eir il contrat cul Chantun Grischun, chi gnarà suottascrit amo avant Nadal.

**Pumpiers Zernez – vicecumandant – demischiun e nouv'elecziun**

La suprastanza cumünala elegia a Peider Bezzola da Zernez sco nouv vicecumandant dals Pumpiers Zernez. El aintra in piazza als 1. schner 2020 e rimplazza a Gian Reto Rodigari chi ha demischiunà sia funcziun sco vicecumandant sülla fin da l'on 2019.

**Rapport da survaglianza finanziaria da l'uffizi chantunal da cumüns per l'on 2018**

L'uffizi per cumüns scriva minch'on ün rapport da survaglianza. La suprastanza ha tut posiziun in sen positiv e nun ha gnü da far ingünas intervenziuns.